



3. marts 2023

Inatsisartut ingerlatsinermut maleruagassaasa § 37 imm. 1 tunngavigalugu Naalakkersuisunut ukuningga apeqquteqaateqarpunga:

**Naalakkersuisunut apeqquteqaatit:**

- 1. §37 tunngavigalugu apeqquteqaat normu 010/23-mi Naalakkersuisut akissuteqarnerminni ersarissarpaat aalisarnissamut ingerlatsilersussaq nutaaq ukiuni siuliini aalisakkanut taakkununga qinnuteqarfigisimasamut pisassiismanerni inuk suliffeqarfilluunniit akuersissuteqarsimassanngitsoq. Nutaamik ingerlatsilersussamik taamatut paasinnissimaneq sulii Naalakkersuisunit attanneqarpa?**
  - a. Royal Greenland Nunatta Kangiani saarullittassiissuteqareersoq, ingerlatseqatigiiffik Tuukkaq Trawl pisilluni ilannguffigaa, 33,33 aammalu 49,99 procent akornanni piginneqataassuteqarluni<sup>1</sup>. Paasissutissaq tamanna tunngavigigaluarlugu Tuukkaq Trawl ingerlatsisutut nutaatut sulii Naalakkersuisut isigaa?
  - b. Suna peqputigalugu Tuukkaq Trawl-mi piginneqataassutsit Naalakkersuisuniit tamanut ilisimatitsissutigineqarsimangillat, soorlu §37 tunngavigalugu apeqquteqaatigisimasaga normu 035/23 17. Februar ullulerneqarsimsoq aqputigalugu?
  
- 2. Ingerlatsisoq pioreersoq, ingerlatsivik nutaatut isigineqalernissaq anguniarlugu ingerlatsivik nutaaq piginneqataassutsikkut qanoq annertutigisumik piginneqataaansaa Naalakkersuisut isumaqarpat?**
  - a. Aalisarluni ingerlatsisutut nutaatut qaqugukkut isigineqalernissamut Inatsisitigut/maleruagassatigut/uuttuutitigut pioreersunut Naalakkersuisut tikkuussinissaat peqquneqarput.

**3. Pineqartumut Naalakkersuisut allanik paasissutissiisinaanerlutik?**

(Inatsisartunut ilaasortaq Jens-Frederik Nielsen, Demokraatit)

**Tunngavilersuut**

Siullermik §37 tunngavigalugu apeqquteqaatigisimasannut normu 010/23 aamma 035/23 akissutigineqarsimasut qujassutigaakka. Akissutigineqarsimasut malitseqartitsisumik apeqquteqarnissannut tunngavissiisimapput, maannalu nassiuppakka.

Oqaatigissavara pisortanit pigineqartoq Royal Greenland ingerlatseqatigiiffimmut Tuukkaq Trawl-mut taama annerstutigisumik piginneqataalersimaneranik Naalakkersuisut tamanut ilisimatitsisimanginnera eqqumiigigakku.

---

<sup>1</sup> <https://profiler.dk/43614770>



**DEMOKRAATIT**  
DEMOKRATERNE

Ileqqorineqartoq ajoraluartumik Naalakkersuisut tungaanniit pineqartup matoqqasuik suliarineqarnissaanik kissaateqarnertut isigisassaavoq. Naalakkersuisut ammanerusumik demokratiskiusumillu ingerlatsinissaat kissaateqarfigaakka.

Taakku avataasigut §37 tungavigalugu apeqquteqaatigisimasannut normu 010/23-mut tungavilersuutinnut innersuussivunga.

Apeqqutit ullut qulit suliffiusut iluanni akineqareersimanissaat kissaatigaara.